



La supranza da la Giuventetgna Rumantscha en l'ustaria a l'Arcas. Sin la fotografia manca Swen Gaberthüel.



CARRICATURA U. CANDRIAN

Eis ti «normals»?

DAD ALESSIO SCHMED

Gia da pign ensi vegni mussau tgei impurtonza ch'il «normal» ha.

Il style, la religium, il caracter ed launc bia daplì sto corrispunder alla norma. E sche buc, s'audan ins buca vitier. Exact quei fa tema als carstgauns, buca s'udir vitier, igl ei la tema ch'ìls auters rian ora e stauschien ora els.

Tgei ei denton «normal»? Normal ei quei che la gronda massa, pia quei che la societad prentenda che corrispunda alla norma. Ei dat senz'alter persunas che vulan s'udir tier quella massa stricta. Ellas adatteschan lur caracter e piardan aschia l'atgna personalitad. Sche ti vul pia s'udir tier quella populaziun «normala» stos ti corrispunder alla norma, detg alter: esser normals.

Quei secuntener sco la norma vegn formaus entras biars facturs: entras las medias socialas, trends, la moda e naturalmein entras ils carstgauns, nua che cunzun ils geniturs, scolasts ed influencers giogan ina rolla impurtonta. Da viver diltut senza vegnir manipulaus ei buca pusseivel, nun che ti vul viver in'entira veta persuls senza las medias socialas.

La finala ei quei la decisiun da mintga singul carstgaun con bia libertad ch'el vul. Ins sto semplamein enconuscher las consequenzas ch'ei ha sch'ins corrispunda buc alla norma.

Sche ti vul esser tetez eis ti buca normals, mobein singulars, in carstgaun cun in'atgna personalitad ch'ei dat mo inaga sin quei mund.

Agens projects e finamiras

■ (GiuRu) L'emprima sesida da la supranza da la Giuventetgna Rumantscha (GiuRu) en il nov onn ha gi lieu a Cuira en l'ustaria «Zum Metzgerot» manada da Catarina Jenny. La cuschniera è uriunda da Preaz en la Muntogna da Schons e maina dapi intgins onns l'ustaria cun tratgas tipicas grischunas-mexicanas a l'Arcas en la citad veglia da Cuira.

Nus avain l'emprim discutà e tegni sesida en noss biro cumparti avant che nus avain tschainà e discutà libramain davart projects e miras per la GiuRu. Ina sfida che la GiuRu ha è da tegnair ina tscherta structuraziun funcziunanta. Uschia è il contact tar las singulas giuventetgnas bunmain inexistent, ma era tar ils singuls commembers n'ha la GiuRu betg gist in

stretg contact, ma adina megljer. Lura n'ha ina commembranza tar la GiuRu era nagin avantatg directamain visibel. Era quai vulain nus midar en quest onn nov. Probablmain cun sustegnair locals da cultura, cunzun musica e litteratura, en il territori rumantsch. Pertge là ha la GiuRu fitg buns contacts tar la scena culturala rumantscha. Las bleras dumondas da sustegn derivan da là tar la GiuRu. Talas dumondas ha la supranza tractandà avant ch'ir a tschaina.

Fin ils 27 d'avrigl 2019 sa cumpona questa supranza anc suandantamain: *Wolf Candrian*, president; *Maurus Bundi*, vicepresidente; *Michelle Parli*, actuaara; *Swen Gaberthüel*, cassier; *Leander Albin*, assessor; *Naomi Arpagaus*, assessura. Lura vegni er a dar intginas midadas, Swen

Gaberthüel banduna la supranza suenter dus onns perquai che l'uffizi da cassier sa cruscha memia bler cun la professiun.

Sonda, ils 27 d'avrigl 2019 ha lieu la radunanza generala da la GiuRu nua che nus vegnin a tscherner ina nova supranza che surpiglia il post da cassiera. Nus avain gia ina candidata che nus vegnin a preschentar a Cuira, uschia che nagin privel da vegnir sfurzà en in uffizi è avant maun durant la radunanza. Bun fiss dentant sch'er inquals vegnissan per elegir la nova supranza dal Surmeir. La saira ha era lieu in concert en il local cumparti e sch'insatgi ha veglia da dormir a Cuira po la GiuRu er organisar ina chombra u in letg. T'annunzia sche ti vegnas e nus pudain guardar ensemen.

■ YEN/GIURU EVENTS 2019

Enviern

Tge: Kick-off
Nua: Donja Stubica, Croazia
Cura: 11-17-02

Primavaira

Seminari da Pasca
Sfântu Gheorghe, Rumenia
12-19-04 cun radunanza generala da la YEN ils 18-04

Radunanza generala da la GiuRu
Cuira, Hohenbühlweg 4
27-04 allas 18.00

Stad

Study Session cun Alliance
Brüssel u Budapest
23-29-06

Breaking Walls Building Walls
Val Müstair 09-17-06
ed Irlandia ils 30-06-08-07

Dikh He Na Bister
Cracovia, Pologna
29-07-03-08

Atun


Giubileum 100 onns Lia Rumantscha
Zuoz, Engiadin'Ota
01-18-08 cun di tematic
«minoritads europeas» ils 10-08

Seminari d'atun
Sotschi, Russia
07-14-10

Breaking Walls Building Walls
Israel, cun NaKultur, 26-10-04-11

Entant che la GiuRu figurescha sco uniun tetgala per las uniuns da giuventetgna localas è la YEN (Youth of European Nationalities) l'uniun tetgala da las minoritads linguisticas da l'Europa. La YEN promova il mantegniment ed il svilup dals dretgs per minoritads e gruppas etnicas en l'Europa e rinforza la schientscha entaifer la minoritad. Perquai datti quatter giadas ad onn scuntradas organisadas entras la YEN, allas qualas mintgamai duas fin quatter persunas per minoritad dastgan separticipar. Sche ti has interest da far part per la minoritad rumantscha ad uschia in inscunter e per infurmaziuns ulteriuras ans contactescha per mail sin giuru@giuru.ch ed er allas occurrenzas en il Grischun èn tuts cordialmain envidads.

GiuRu



GRAFICA A. SCHMED